

**Jawatankuasa Khas Atasi Tindakan Sabotaj Calon BN Pamer Keseriusan Umno
Bernama
23 Oktober, 2012**

KUALA LUMPUR, 23 Okt (Bernama) -- Penubuhan jawatankuasa khas untuk memantau dan mengambil tindakan segera terhadap mana-mana anggota parti yang mengkhianati atau mensabotaj calon Barisan Nasional (BN) mempamerkan keseriusan Umno untuk mengatasi masalah itu.

Ketua Umno Bahagian Titiwangsa Datuk Seri Dr Suleiman Mohamed berkata penubuhan jawatankuasa itu juga adalah sebahagian daripada transformasi politik yang sedang dilakukan Umno.

"Pada pandangan saya, jawatankuasa itu akan ditugaskan sebagai pemantau dan akan menyiasat elemen-elemen sabotaj hingga ke akar umbi dan akan memberi laporan kepada Lembaga Displin Umno untuk diambil tindakan.

"Seperti kita maklum, Lembaga Disiplin tidak turun ke bawah (akar umbi) dan hanya menerima laporan daripada pihak yang membuat aduan berbanding jawatankuasa khas itu yang akan turun ke akar umbi untuk memantau dan merekodkan kesalahan yang dilakukan ahli. Maka atas dasar inilah jawatankuasa khas itu ditubuhkan," katanya kepada Bernama di sini, hari ini.

Suleiman yang juga anggota jawatankuasa Badan Perhubungan Umno Wilayah Persekutuan berkata penubuhan jawatankuasa itu tepat memandangkan elemen sabotaj menjadi faktor utama kekalahan BN pada pilihan raya umum ke-12 pada 2008.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=704274>